

# INUIT ATAQATIGIIT

## INATSISARTUNI



UPA16/109  
26. april 2016  
Agathe Fontain

Inatsisissatut siunnersuut , Nunatsinni politikikkut aqqissuusaanermut attuisusaaq, allannguinermillu kinguneqarsinnaalluortoq. Ullumikkummi Naalakkersuisut, kommunellu akissaaffii immikkoortinneqarput, kommuneni akissussaaffinnut tunngasut tassaammata politikikkut kommunalbestyrelsenik akissussaaffigineqartut.

Inatsimummi allannguutissatut siunnersuummi, Naalakkersuisut, kommunini isumaginninnermi allattortarfiit tamakkiisumik ilaannakortumilluuniit atorunnaarsissinnaalissavaat. Tassa imaappoq kommunalnestyrelsep, kommunini politikikkut akissussaasuusut, akissussaaffimmik arsaarneqartalissapput, Naalakkersuisullu komunalbestyrelse-nngortassallutik. A assaa.

Taammaattoqartillugu aqutsineq ajorluinnartarsimassaaq.

Taamaattumik Naalakkersuisut siunnersuuteqartariaqalersimapput kommunini tamarmiusuni sumiginnaaneq annertuvallaaqimmat !

Inuit Ataqatigiinniit erseqqissarlarput, kommunit meeqqanik immikkut ittumik pisariaqartitsisunik sumiginnaaneq akuerinnginnatsigu. Kommunit pisussaaffimminnik sumiginnaasimapput, eqqugaappullu meeqqat immikkorluinnaq ittumik pisariaqartitsisut.

Ataatsimiitaliani akissussaasuni, siulittaasut, ilaasortaasut, Borgmesterillu minnerunngitsumik sumiginnaaqataasimallutik. Kommunalbestyrelse-llu ilisimatinneqarsimatillutik aamma akissussaaffimmik tigummeqataallutik.

Naalakkersuisut kommunini qinigaaffiup iluani kommunit tamaasa ataasiarluni nakkutilliffigisussaavai.

Nakkutillineq kisiat isumalluutigigaanni, imaappoq, ajortoq pereersoq, nassaarineqassaaq, tassa meeraq atornerlunneqarsimasoq pineqarpat, Persuttarneqarsimasorluunniit pineqarpat, kommunilu iliuuseqarsimanngitsoq paasineqassapput.

Ilumut allatigut aqqiisoqarsinnaangila?

Ilisimavarput kommunini sullissisut amerlavallaarujussuartunik sulianik tigummisartut. ILisimavarput amerlavallaanik sulianik tigumiaraanni, eqqissilluni sulissisoq pilersaarusiortuni iliuuseqarnissanik, aqqiissutissanillu sulisinnaangitsoq.

Sooruna tamanna taamak pinaaserfigineqartigisoq ? Inuit Ataqatigiit isumaqarpugut sullissisut suliamikkut tulluurtunik amerlassusilinnik sullitaqalerpata, ajornartorsiut aqqinnissaanut aqutaassasoq.

Naalakkersuisut pilersitaat Qitiusumik Siunnersuisarfik, aallartilluanngitsorluunniit, atorsinnaangitsutut nalilerneqarami ? Sunniutai siunertarisaminut innginnamiik? Naatsorsuutigaluarparput tamanna aamma iluaqutaajumaartoq.

Tusarniaanermi akissutit misissoraanni, tupinnanngitsumik kommunit isumaqataangilluinnarput. Kommunit nammineersinnaassusaat innarlerneqarnissaannik ernummateqarlutik.

Kommunit ilaannit Kommunit Aaqqisuusnaaneranun sulineq innarlerneqarnissaa ernummatigineqarpoq. Siunissami kommuninut suliffiit nuuttussatut suliissaanut aamma tuniluussinnaanerat eqqarsaatigalugu.

Kommunit ilaaniit siunnersuutigineqarpoq, sullissisut suliassa amerlassusaat killilerneqarpat iluaqutaassasoq.

Inuit Pisinnaatitaaffiit Kalaallit Nunaata Siunnersuisoqatigiivisa erseqqissarpaat suliassaqarfimmi misissueqqissaarnerpiamut innersuussisoqanngitsoq, taamaattumillu inatsisissatut siunnersuummi aaqqiissutissatut toqqarneqartoq meeqqamut pitsaanerpaamik sunniuteqarnersoq nalunartoq isumaqarlutik.

Inuit Ataqtigiinnit tamanna paasilluarparput, qanormi ililluta qulakkiissavarput assersuutigalugu, meeqqat angerlarsimaffiup avataanut inissitassaappat, inissitassallu utaqqisuniippata, qanoq Naalakkersuisut iliorniarpata? Naalakkersuisummi akisussaaffigimassuk inissiiffissanik naammattunik peqarnissaq.

Nuna tammakkerlugu Siunnersuisarfik akisummi assorsuaq isorinnippoq, allaat allapput kommunit namminersinnaatitaanerata , uppernassusaallu innarlerneqassasut, aammalu aqutsinermi pisinnaatitaaffiit unioqputinneqassasut. Taammaat ataatsimiititaliami isorineqartut maluginiarneqartariaqarput.

Siunnersuut sulianut allanut sulianut tuniluussinnaasoq eqqarsaatigeqqarput. Periarfissaalissaarmi assersuutigalugu Piareersarfiit pissusissamisut ingerlanngippata, taava Naalakkersuit Inatsit taakkununga tunngasoq aamma allanngortissinnaalissavaat, Naalakkersuisut aqutsigallartunngortissinnaallugit, taamatut pisoqarsinnaavoq , assersuutigalugu Meeqqat atuarfianni, angusinngitsoortut amerlavallaarpata, taava Naalakkersuisut inatsit taakkununga tunngasoq aamma immineq aqutsigallartarsinnaangortikkunikku periuseq uterneqassaaq.

Suliffiit nutaat Kommunit Aaqqissuuteqqinneranit kommuninut nutsigaasat eqqorneqassappat? Ernumaammernanngitsuunngilaq Naalakkersuisut periarfissamik eqqartukkatta assinganik pilersitsippata.

Inuit Ataqtigiit Inatsimmut allannguutissaq eqqartorluaqqaarneqarnissaa innersuussutigaarput, tusarniaanermilu akissutigineqartut tamaasa maluginiarluarneqarnissaat inassutigaarput.

Naalakkersuisut Kommunit Inatsisartut naapeqatigeeriarlik, meeqqat pineqartut eqqugaasernerat unitsinneqartariaqarmat, periusissarlu tamanit iluarineqartoq nassaariniartariaqarpoq, meeqqalli salliutinneqarilik.

Ilaqutariinnermut Peqqissutsimut ataatsimiititaliamut innersuupparput, **tusarniaanermi akissutigineqartut tamaasa misissorluaqqullugit aammalu** ataatsimiititaliat allat susassaqartut suleqatiginnissat innersuulluguttaaq.